

## REGIONAL NEWS

HEADLINES:-

1. Chief Minister Pu Lalduhoma'n, Information Technology chu khawvel huapa sorkar kalphung leh inrelbawl dan tidanglamtu a ni, a ti.
2. Leimin avangin Keifang leh Tuivawl inkar chu lirthei eng chi mah kaltlang theih lovin a ping rih.
3. MNF Legal Board chuan, ZPM Sorkar chuan politics-a phuba lak nan CBI hman an tum tih chiang takin a lang an ti.
4. Union Finance Minister Nirmala Sitharaman chuan vawiin khan Narendra Modia kaihhruai sawrkara term thumnaa budget hmasa ber Union Budget 2024-25 Lok Sabha ah a pharh.

&lt;&gt;&lt;&gt;&lt;&gt;

CM

Chief Minister Pu Lalduhoma'n, Information Technology chu khawvel huapa sorkar kalphung leh inrelbawl dan tidanglamtu a ni, a ti.

He thu hi Information & Communication Technology Dept. huaihawt, Mizoram Assembly Annexe Hall-a Government Online Excellence Award semna hun vawiina neih-ah sawiin Chief Minister chuan, Mizoram sorkar hnuai inrelbawl na kawngah Information Technology hman a nih avangin kawng tam takin hna a awlsam phah bakah sorkar leh mipui inkarah pawh rah tha a chhuah a ni, a ti a. Mihringte nitin nun hman danah pawh information technology chu hmasawna thlentun a nih thu a sawi.

ICT Minister Dr. Vanlalhlana pawhin thu sawiin, ICT-in lawmman an sem chu, sem satliah mai an nih loh thu leh sorkar inrelbawl na atana thil pawimawh tak a nih thu a sawi a. Mizoram sorkar hnuai department hrang hrangte pawhin internet kaltlanga hna thawh an thiam zual zel theih nan theihtawpa tan an lak zual sauh sauh a ngai a, zirna in leh department dangte pawhin hmasawn zelna atan tunlai thiamna an hman a pawimawh, a ti.

ICT Minister chuan Mizoram sorkar hnuai Department zingah website nei si, enkawl mumal lo an awm thin chu a that loh thu sawiin, mipui ten an chhawr theih tur atana website kaltlanga department hmalakna kawngah tan an lak zual sauh sauh a ngai, a ti. He huna tel Chief Secretary Dr. Renu Sharma chuan sawrkar inrelbawl naa Information Technology-in a tum ber chu mipuite tana awlsamna thlen a ni, a ti a. Rorelna langtlang leh felfai a awm theihna atan Information Technology chu hmanraw tha tak a nih thu a sawi.

&lt;&gt;&lt;&gt;&lt;&gt;

RUIHHLO DO MONITORING APP

Social Welfare and Tribal Affairs Chief Executive Officer Pi Lalhlupuii Sailo chuan vawiin khan Ruihhlo Do kawnga hmalakna internet hmanga vilna tur application, epi.info a hawng a, Ruihhlo Do chungchanga inelna Video/Reels Competition lawmman sem a ni bawk.

SAD Conference Hall MINECO Aizawl-ah he hun hi hman a ni a, Pi Lalhlupuii Sailo chuan application tlangzarh tak chu ramchunga a hmasa ber a nih thu leh statistical information a nih tel thu a sawi a, tun dinhmunah zirlai sikul kal mek zingah pawh ruihhlo ti an pun nasat thu a sawi.

He hun hmanpuitu Social Welfare, Tribal Affairs, Women & Child Development Department Commissioner Pi Lalzarmawii pawhin thusawiin zirlaite chu Ruihhlo Do kawnga an thiamna neihte hmang chhunzawm zel turin a sawm a, thalaiten Social Media an hman nasat thu a sawi bakah Ruihhlo do kawnga Video Reel Siam chuan Mizo thalaite zingah awmzia a nei hle a ni, a ti. Pi Lalzarmawii chuan kalkhawmte chu Ruihhlo do kawnga tha thlah lova bei zel turin a sawm bawk.

He hunah hian Excise and Narcotics Department Joint Commissioner Pu Peter Zohmingthanga pawhin thusawiin zirlaiten lemchan tawi, video reel hlawhtling taka an siamna phenah an zirtirtute leh an chhungte an inphum ruk thu sawiin Media platform-a pho lan tlak video zirlaiten an siam chu thil lawmawm tak a nih thu a sawi bawk.

<><><>

#### SAITUAL

Vawiin chhun khan National Highway No.102 B Keifang leh Tuivawl inkar, Keifang atanga Km 8 vela hla kawng ko chu nasa takin a min a, chanchin buatsaih lai thleng hi chuan lirthei eng chi mah kaltlang theih a ni lo.

Kan corr Rammawizuala sawi danin, helai leimin hi lung khawkrawk hmun niin chawhnu 1:00pm hnu lamah pawh a khat tawkin lung a tla reng a, mihring tan pawh kal kai mai a him loh avangin lirthei leh kea kal tangkhang an thahnem hle.

Loh theih lova Champhai tlangdung atanga Aizawl pan ngaite chu Kawkulhah let chho leh in Saichal lam atanga hel tum an awm nual a, helai kawng pawh hi ruah a sur chuan kal tlang harsa khawpin a chhe tho a ni.

Leiminna bulah hian company mi leh sa hnatkawkte pawh khawl nen inchhawp mahse a leilung enin then fai mai ngam a nih hrih loh avangin lei tlakna bulah hian inring sain an awm a, lei tawlh hi a nasat avangin khawl ringawt chuan thenfai theih a ni dawn lova, lung halna rawih a ngaih tur thu hnathwktute chuan an sawi a, khuain a thim hnan chuan zan lamah thawh theih a nih dawn loh avangin leimin hian zanin zankhua a awh rin a ni.

Kan corr sawi danin, tunlai hian Ngopa leh Tuivawl inkar kawng chhe lutuk avangin Ngopa tlangdung khaw hrang hrang mipuite an mangang hle a. Ngopa tlangdung kawng hi National Highway No.6 Manipur State pawh tura NHIDCL hnuai Contractor ten an laih mek a ni a, khuarel chhياتna te, kawng laih vanga chhe satliah chu hriatthiam theih a nih rualin tun dinhmuna kawng chhيات dan erawh, hnathawktu Company lamte inthlahdah vanga thleng hi a tam zawk a nih ngei an rin thu leh, helai tlangdung mipuite inzahlohna lian taka an ngaih thu Pu Lalropuia Chiahpui VCP chuan a sawi a, thuneitu lamten a rang lama hma lakpui se an duh thu a sawi bawk.

Kawng chhيات lutuk avang hian helai tlangdung mipuite chuan harsatna an tawk nasa tawh tih sawiin, Maxi Cab Service pawh kal ngam lovin an chawlh chang a awm fo a, khawtlang pawimawh Office dawr leh chhungkaw pawimawha te, zirlaite tan duh hunah zin chhuah a theih loh niin an sawi. Lirthei loh theih lova an kal chang pawhin kawng chhe karah riah inring saa kal a ngaih thu te, a bik takin damlohna thila zin veivah a ngaih changin a manganthlak zual niin an sawi bawk.

Motor lian, nitin chakkhai phurte chu Excavator nen vil zui a ngai a, Km 1 kal turin an tihfuh loh tum chuan nilenga hun hman a ngaih chang a awm niin an sawi.

Hemi chungchang hi Saitual District VC Association chuan NHIDCL-ah wawi tam an thlen tawh thu leh Tuivawl-Saitual inkar phei chu Contractor thlan an awm lova, a khawihtu tur ni lo, Sersing Company chuan a chhe zual an va hmui chauh thin niin an sawi.

<><><>

#### MNF PRESS CONF

MNF Legal Board chuan, ZPM Sorkar chuan politics-a phuba lak nan CBI hman an tum tih Chiang takin a lang an ti.

He thu hi vawiina Aizawl Press Club-a chanchinbu mite an kawmnaah MNF Legal Board hruaitute chuan sawiin, Chief Minister-in nasa taka a lo tlangau pui tawh ang ngeia eirukna chhui turin CBI te thuneihna pumhlum pe tura an phut thu an sawi a, ZPM Sorkar chu CBI chhui tur leh chhui loh tur case thlang kual vela hun khawh ral lo tura an ngen thu an sawi bawk.

CBI ten Mizoram sorkar phalna an neih chauhva eirukna an chhui theihna tur thuchhuah siam a nih rual deuh thaw a, ZPM Legal Department-ten Lokayukta-a case thlan chhuah bik pathum te chauh CBI chhuitir tura ngenna lehkha an theh lut nghal chuan ZPM Sorkar leh Chief Minister huat zawngte chauh chhuitir a, an lamtang leh ZPM mi leh sa-te erawh hum zel an tum zia a lantir an ti a, chu chuan politics-a phuba lak nan CBI hman an tum tih Chiang taka a lantir thu an sawi a, Mizorama la thleng ngai lo leh Mizoram mipuite ngaih dan en pawh a Kristian rama thleng atana thil mawi lo tak a nih thu an sawi bawk.

MNF Legal Board hruaitute chuan ZPM Sorkar-in eirukna, sum hman dik lohna leh pawikhawihna lian thamte CBI hmanga do an tum tak tak a nih chuan Home Department hnuai tender lem chhuah dante, Mizoram Lok Sabha MP ni lai mek in a Mizorama grape chingtute chan tur Markert Intervention Scheme hnuai za a 35 cheng nuai za a lo fanghma no ei thu leh amah ngeiin a ZPM Party Office-a a lo puan chhuah tawh te, Buhfai Supply tu tur thlan kawnga dan kalha a chhang hniam ber nilo, an duhsak zawng an pek avanga mipui sum tam tak luangral tur chungchang bakah Work Supervisor invuaha party worker-te hnena dan kalh a Contract hna pek chungchangte leh thil diklo dang ZPM sorkar hnuai thleng mekte pawh ZPM Sorkar chuan CBI te chhui tir tura ngen nghal turin ZPM sorkar chu an ngaih thu an sawi.

<><><>

#### UNION BUDGET

Union Finance Minister Nirmala Sitharaman chuan vawiin Khan Narendra Modi kaihhruai sawrkara term thumnaa budget hmasa ber Union Budget 2024-25 Lok Sabha ah a pharh a. Thusawiin Pi Sitharaman-I chuan khawvel buaina tam tak karah India sum leh paiin hma a sawn tih sawiin hun lo kal turah ram hmasawn chak ber a ni dawn a ti a. Tun tum budget chuan hna, thiamthil, MSME leh Middle Class te a thlur bing dawn a, hemi atan hian thalai te tan Prime Minister package siam a ni ang a ti bawk.

Ram changkanga India siamna tur Viksit Bharat tana hmathlir sawiin budgetah hian thil pakua ngaih pawimawh a ni ang a ti a. Hengte hi Agriculture lama tharchhuah tihpun leh tlo siamte, Employment leh skilling, Inclusive Human Resource Development and Social Justice, Manufacturing leh services, Urban Development, Energy Security,

Infrastructure, Innovation, Research & Development leh Next Generation Reform te a ni a.

Union Finance Minister chuan hlawh nei te tana Income Tax pe thei bithliah chu cheng sing nga chin atangin cheng sing sarifah a ti sang a.

He chhiah lak dan thar avang hian Income tax ah cheng vaibelchhe 17,500 chuang hlawh neia hnathawkte hian an hum dawn a. Hei bakah hian sawrkar laipui chuan Income Tax Act,1961 zau taka ennawn a tum thu a sawi a.

Tun tum budget ah hian Agriculture leh allied sector tan cheng vaibelchh nuai 1 sing 5 leh sang 2 dah a ni a. PM Awas Yojana ah chenna in vaibelchhe thum thingtlang leh khawpuiah sak belh a ni dawn a. Hei bakah hian hmeichhia puitling leh naupangte hamthatna tur scheme atan cheng vaibelchhe nuai 3 dah a ni a. Ramchhunga tlang mi Tribal te khawsak tihmasawn turin kawng hrang hrang hmalak anih tur thu Budget ah hian tarlan a ni baw. Union Finance Minister hian thingtlang tihmasawna turin cheng vaibelchhe nuai 2 sing 6 leh sang 6 a rawt a. Heng sumte hi thingtlanga hmasawna ruhrel dinna tur a ni dawn a. Hmarchhakah India Post Payment Bank 100 chuang din a ni ang a ti baw.

<><><>